

Per via di una chjama à prugetti, cerca l'uffiziu di u sviluppu agriculu è rurale di a Corsica à rinnuvà i vechji arbureti tradiziunali. U scopu : accompagnà e cullettività per rilancià l'ecunomia incù l'agricultura

Hè semplice a filusufia di u prugettu. Si tratta di dà un abbriu novu à l'ecunomia rurale per via di l'agricultura. Basta à spassighjà per sti paesi o à girà per issi stradò per accorghje si ne : ùn mancanu i lochi senza cura è abbandunati. Hà scambiatu u fà di u tempu i piani d'orti per lascià isse curtaline vechje è isse ripate à vaccheghju. Ma pudarianu cambià l'affari : pocu fà, hà lampatu l'uffiziu di u sviluppu agriculu è rurale di a Corsica (Odarc) una chjama à prugetti, sin'à a fine di l'annu, per ricunquistà l'arbureti sparsi in i paesi da ch'elli ripigliessinu suchju.

"Avenu parechji arburi ch'è anu un valore culturale è identitariu, spieca Marie-Pierre Bianchini, a direttrice di l'Odarc. U nostru scopu hè di rinnuvà l'arbureti di prima ma dinù di fà ne cresce d'altri".

Di dicembre scorsu, hè statu presentatu in corte parolle issu prugettu da Lionel Mortini, u presidente di l'Odarc, mentre a sessione di l'Assemblea di Corsica. Secondu ellu, hà parechji obbiettivi issu programma : pò permette à tempu di luttà contru à i fochi, d'imbelli i paisaghji di i paesi, di mantene u patrimoniu ma dinù di sviluppà l'attitività ecunomiche in giru à l'agricultura.

Certi prugetti finanziati fin'à 100 %

In fatti, duverebbe permette issi pulitica di "riacquistu" di fà piantà a sminuzione di l'aree cunsacrate à l'arburicoltura. Puru s'ella pare di esse si megliurata a situazione sti pochi anni, eranu calate di 13 % e surfazie coltivate dapoi u principiu di l'anni 2000.

Oghje ghjornu, si parla, à l'ingrossu, di circa 7 000 ettari d'arbureti inde a Corsica sana, nant'à 187 947 ettari cunsacrati à a pruduzione agricola in u 2017. Ma, à sente à l'Odarc, si ne puderia sfruttà assai di più, aiutendu l'attori publichi ch'è ammaestregghjanu u fundariu à ripiglià i lochi sparsi. *"Hà da accompagnà u nostru dispusitivu l'investimenti di e cullettività lucale per rinnuvà l'anziani arbureti nant'à u so territoriu, spieca Lionel Mortini. Permet-*

terà tandu di turnà à sfruttà certi lochi, ch'è seranu messi à dispusizione d'agricultori omancu per una quindicina d'anni incù un affittu".

Seranu finanziati i prugetti fin'à 120 000 eurò à u livellu di 60 % inde e comune di più di 3 000 abitanti, ma sò soprattutto i paesi di u rurale ch'è si pudaranu buscà l'aiuti i più impurtanti. Puderanu dumandà e comune di menu di 3 000 abitanti un finanziamentu fin'à 90 % è puru 100 % per quelle ch'è anu un associu fundariu pastorale (AFP).

"Sviluppà l'agricultura in i paesi"

D'appressu à i servizii di l'uffiziu, riguardanu issi prugetti di rinnuvazione tutte e culture tradiziunale : l'alivu, u castagnu, u prugnulu, l'amandulu, u clementinu... *"S'indirizza u dispusitivu à e spluttazione principale ma dinù à l'attività secundarie da pudè tucà un publicu rurale assai largu, accertanu i servizii di l'Odarc. L'ambizione hè di sviluppà quant'è pussibile attività nove in i paesi, ch'è pudessinu fà campà e famiglie purghjendu li rivenuti regulari".* Di sicuru, ùn basterà à rinnuvà l'arbureti per sviluppà l'attività. Da stu puntu di vista, s'impegna digià l'uffiziu per produce i pianti ch'elli abbisogneranu issi arbureti. Sti pochi anni, hà messu in ballu l'Odarc un prugettu di creazione di pepiniera nant'à un terrenu di a Cullettività di Corsica in u rughjone di Vizzavona, ch'è duverebbe sbuccà quist'annu. Torna quì, hè doppiu u scopu : prutege a biodiversità di pettu à u periculu cagionatu da l'impurtazione di vegetali, po di sicuru sustene u sviluppu di l'arbureti è a pruduzione.

"A nostra indiatuà hè di cumpensà e piante ch'è venenu à mancà da pudè creà è fà cresce l'arbureti, face sapè Marie-Pierre Bianchini. Avenu digià iniziatu un travagliu in giru à e sumente, soprattutto per a castaneicoltura o a cipola di Siscu, è avemu da rinforzà lu incù una logica di certificazione in appellazione d'origine. Ch'è u scopu ùn hè micca solu di produce, si tratta di avè prudutti identitarii è di alta qualità".